

CE SONT LI III MORS ET LI III VIS  
QUE BAUDOUINS DE CONDÉ FIST.



NSI con la matère  
[conte,  
Il furent si, que duc,  
[que conte,  
Trois noble home,  
[de grant arroi

Et de rice, con fil à roi,  
Et avec moult joli et gent.  
Fort ièrent envers toute gent ;  
Vorent de terre à marcier.  
I jour, pour lor orguel marcier,  
Leur apert j. miréoir Diex,  
Tourble et obscur à veoir de iex,  
Et lait ; de ce ne vous ment-gie ;  
C'ièrent iij mort de vers mengié,





Lait et deffiguré des cors.  
Or fu as iij vis grans descors,  
Ki ièrent, de cors et de face,  
Des plus biaux que Nature face,  
Et cil si oscur et si lait,  
Que Mors rien à laidir n'i lait.



Li iij vif voient les iij mors  
De grief morsure ij fois mors,  
Prime de Mort et puis de vers.  
Premier les regardent devers  
Les vis, et puis as cors après;  
Si voient que Mors les a près  
Menez, et, après Mort, li vier  
Par mains tans, l'esté et l'yver.



« Compagnons », dist li un des iij  
Vis hommes, « je sui moult destroys  
« De paour de ces trois mors là.  
« Voiés de chacun que Mors l'a  
« Fait lait et hideus pour véoir.



« Je ne puis en moi pourvéoir  
« Tant de séurté que les voi.  
« Trop sont lait ; ralons ent no voie,  
« K'à poi de paour ne marvoi. »

Dist li autres : « Compains, mar voi  
« Tel mirooir, se ne m'i mire.  
« Souffrés vous que Diex le vous mire;  
« Diex, ki le nous a mis en voie,  
« Ce miréoir le nous envoie  
« Pour mirer ; si nous i mirons.  
« Et certes ci ne s'i mire hons  
« Tant orguelleus, s'à droit se mire,  
« Qui bien n'ait de cel mehaing mire,  
« Et, pour Diu, de tant ne me irés  
« K'aveuc moi ne vous i mirés. »

Dist li tiers vis : « Biau sire Diex,  
« C'est du véoir pités et d'iex.  
« E las, k'il sont des cors alé !  
« Voiés que cascuns poi a lé





« Le pis, le ventre, ne le dos.  
 « Li plus carnus n'est mais que de os;  
 « N'a d'entier lial, ès le mains,  
 « Piés, gambes, ne bras, ne mains,  
 « Dos, ne ventre, espaule ne pis.  
 « Mort et vers i ont fait le pis  
 « K'il pueent. Il pert bien à euls,  
 « A bouces, as nés et as eux,  
 « Et par tout aus; de cief en cief  
 « Voiies; tout iij n'ont poil en cief,  
 « Oeul en front, ne bouce, ne nés,  
 « Ne vis; n'est hom de mère nés  
 « Ki ne fust de véoir confus.  
 « Vés les là, sès (serfs) et rois, con fus;  
 « N'a sur aus remès char à prendre;  
 « Ci puet-on à bien faire aprandre. »

Or dist li uns des morts as vis :  
 « Segneurs, regardés-nous as vis,  
 « Et puis as cors; nous qui, à sommes,  
 « Aviens l'avoir, voiies quel sommes;



« Tel serès-vous, et tel, comme ore  
 « Estes, fumes. Jà fu li ore  
 « Et aussi bel et d'autel pris ;  
 « Mais Mors i a tel chatel pris  
 « Ke ne devise-on pour deniers ;  
 « C'est de char, de cuir et de niers,  
 « Dont poi sur les os nous demeure,  
 « Et ce tant est plus noir de meure.  
 « Mirès-vous ci ; jà fui-je dus,  
 « Nobles homs de courage et d'us,  
 « Cis quens, et cis autres marchis ;  
 « Est or bien li orguex marchis,  
 « Ki fu en nous, et li envie  
 « K'aviemes sur nos pers en vie.  
 « Oil voir, à vous jouvenciaus  
 « Le dis, comme à gënt jouné et ciaus  
 « U orguex a esté parus.  
 « Diex nous a à vous apparus  
 « Pour ce que vous metons à voie  
 « De bien, et Diex vous i avoie. »






Dist li secons mors : « Tout de voir,  
« Tous et toutes convient devoir  
« A la mort de tréu l'escors,  
« Par le monde de tous les cors,  
« Dont li ver n'ont mie à escars,  
« Et pluseurs de penture escars.  
« Ha, Mors male, mors griès morsure;  
« Mors felonessse, de mort sure  
« Comme est outrageus tes desrois,  
« Quant ensi mors la char des roys,  
« Des princes, des dus et des contes,  
« Con fais de ceus dont il n'est contes.  
« Bien nous rens tous obscurs et noirs.  
« E Mors, ki viens de père en hoirs,  
« Et d'oirs en hoirs, convient que père  
« Par le mal mors de nostre père  
« Premier, ki ot à non Adans,  
« Ki nous a pené moult à dans;  
« Car de son mors vint nostre mors  
« Par le pume ù il fist le mors,  
« D'ont Mors nous savoura la sève,



« Que jà n'eust savouré, se Ève  
 « Ne fust, ki, par son mal enort,  
 « Nous fist de net liu metre en ort,  
 « Quant hors du paradis terrestre  
 « Nous fist metre pour en terre estre,  
 « Et en dur torment et en fer  
 « De mort et d'aler en enfer,  
 « U tout aliens, quant Diex se ire  
 « Atempra, li rois des rois sire,  
 « Ki sur tous est puissans et fors,  
 « Ki nous traist de tel cartre fors;  
 « Moult fist pour nous; car main n'irons,  
 « Se Dieu pour no mesfait n'irons. »

Dist li tiers mors : « Frère et ami,  
 « Par Diu, or entendés à mi,  
 « Puis k'il est ainsi que de vie  
 « Convient partir, et qu'on dévie  
 « Si que, sans morir, nus ne vit;  
 « El n'en voit-on, ne el ne vit,  
 « Ne ne verra, ce vous afin;

a 5





« Et trop vont plus de gent à fin  
« Joune que viel, voire c. tans ;  
« Car, contre j. home de c. ans  
« Ki muert, en muerent m. de mains,  
« Car en vie n'est nus demains  
« Et, puis k'il n'a demain en vie  
« Ne eure, folement envie  
« Son giu, qui s'afie en jovente.  
« S'en vie ière et viex, et jou vente  
« En trouvasse pour peu d'avoir,  
« Ne m'en seroit il riens d'avoir,  
« Tant éusse à soushait d'argent  
« Puis que Mors fiert de tel dart gent,  
« Et que tel convient devenir  
« Que nous sommes. Vöir, de venir  
« En vie, pour cose que j'öie,  
« Ne voel ; plus i a duel que joie  
« Pour tel morsel, k'est Mors atendre,  
« U il a trop, sans rompre, à tendre.  
« Ha con grief passage et con fort !  
« Ne contre Mort n'a c'un confort ,





« C'est de soi soir et main tenir  
« En boine œuvre et s'i maintenir  
« Que par tous jours vivre u tantos  
« Morir, et que ne soit tant os  
« C'on demeure en pécié une eure;  
« Car mal fait demourer une eure  
« Paine de mort, ki sans fin dure,  
« Et qui, plus tempore, plus est dure.  
« Priés pour nous au patre nostre;  
« S'en dites une patrenostre,  
« Tout iij, de boin cuer et de fin.  
« Que Diex vous prenge à boine fin. »

